

## Jaorverslag vastelaovesverieniging De Spurriemök seizoen 2004-2005.

Seizoen 2004-2005 un seizoen um noëts mèr te vergète. Urst zal ut officiële deel behandeld wèrre

Ut bestuur bestond uut:

Vorzitter	Wout Zanders
Penningmèster	Hans Loonen
Secretaresse	Rian Clephas
Vorst	Eric Flinsenbergh
Bestuursleje	Ruud Zanders
	Rob Pluk
	Jacquo Gerritsen

De raad van elluf bestond dit jaor uut:

Jan Classens	Richard Geurts	Roel de Rijck
Johan Creanmehr	Emiel Evers	Don Clephas
Dave Clephas	Fabian Voermans	Frank Pluym
Don Clephas	Marc Zanders	Ron Sanders

De raad van elluf vergaderde 6 kier bej Wout en Lilian an de Zandhoek.  
Ut bestuur kwaam ien totaal 8 kier bejen.

Ut antal leje bedroeg: 194 leje.

Hiervan ware dur 7 bestuurslid, 12 raadslid en 6 iere-lid nameluk Jan Beerkens, Thei Hendrix, Hay Steeghs, Wil Willems, Gerrit Houwen en Jan Nelissen.

De rest steunt ôs verieniging en is dur bej iën of miërdere evenemente bej.

Seizoen 2004-2005 was un kort mar moj seizoen. Ut was ut carnavalsjaor van Joker Jan, ut seizoen van un klène groëte raad, ut jaor van Emiel, Ankie en Willem, de veule foto's, gezellige bals en de neje Vorst Eric en de griepgolf mit carnaval. Kort zulle now de activiteiten dur genome wèrre.

Op dun 11<sup>de</sup> van dun 11 wier ut seizoen geopend. Dit jaor was de jaorvergadering ien d'n Terp. Zoas gewoonluk wier de notule, ut verslag en de ciefers besproke. Ut was un rustige vergadering. De C.V. vient ut wel prettig as ur leje ur meninge gève, dit mudde zowel op de vergadering doen as daorbute. Un kritische noët hald ôs scherp!

Vrejdags ginge wej naor de Hei. Zej han un Bonte Aovend georganisaerd mit allemaol buutendurpse optrejes. Ut is altied goed um us bej de buure te gaon kieke, daar doede altied wel wèr iedeje op.

Ok 's zaotersdags ginge wej wèr naor de Hei. Nou vur ut Vorsteraodsbal. Ozze Vorst Ruud duj ut kei goed. As ien van de beste Vorste zette hej Oeldere wèr op de kaart. Ut blijft un prestatie um vur zo'n volle krietische zaal un goed stuk te halde. Petje af vur Vorst Ruud.

## Bonte Aovend

Op 19 november 2004 was ut zo wiet en stond de Bonte Aovend op ut program. Vorst Ruud opende de aovend en vur de rest van de aovend bleef hej ok nie stil. Hej praote de ganse aovend an en. Ruud begos mit ut veurlèze van un stukske uut de Peel en Maas. Daor stond un stukske ien, dat dur ovver 10 jaor gèn carnaval mèt ien de durpe zij zien en dat iederiën dan ien Rooij carnaval zij viere. En dit alles was gezèt dur ozze ex-prins van 1967, Jan Driessen. Volges Ruud is zo iemus gèn prins mèt en wier hej umgedoëpt tot Joker Jan dun urste, tot dat hej ien ut openbaar zien weurd terug zij néme. Uut eindluk hèt hej de CV un brief gestuurd, dat zaken anders verweurt zien as hej bedoeld haj. Ut blijft jaommer dat dit gebeurt, zeker vur un bloeiende verening as de Spurriemök is.

De jeugdband What's Ever zaat op de bühn en speulde de ganse aovend un moj stukske muziek. De jeugd hèt de toekomst, mit zo'n jeugdband kunne wej de kommende jaore flink veuruut. Dees jonge en megjes groeje zeker uut tot een goeje Kelderband, geweldig moj is ut um te zien mit hoeveel enthousiasme dees jeugd muziek makt. Ik hoop dat wej nog lang van dees groep meuge geniete.

De urste artieste ware de Spetters, zej danse dat de spetters du vanaf vlooge. Dees megjes make al enkele jaore un schitterende dans, wej hope dan ok dat zej vurleupig nog dur blieve gaon.

As twedde kwaam dun buutreedner mit zien kerstverhaal. Hej vertaalde ut kerstvertaal ien un modern jasje. Waorbej Jozef an de vroetvrouw vroeg hoe laat ut was waarop zej ut is twië minute vur Christus was.

Daorna kwaam dun Dörpspolitiek daor wier Möknagel gespeuld un speudoniem veur Kopspijkers. Zoas altied zien de meense die blunders begaon hebbe wer de klos. Dit jaor mosse twee charmante dames raoje wat goed was. As ut anwoord goed was, moge zej houwe op dun spieker. Tusse de vraoge dur wiere dur Jan Kerselicht gedichte veurgeleze. Mit de juuste toon en beliching laas Jan zien gevuulige gedichte veur.

As vierde kwaam de jubilerende APK, 11 jaor. Wat zaage die dur uut. De Can Can dansend kosse wej geniet van die prachtig gespierde bodies. De prachtige biën en strakke boeke kwaam goed naor veur. Ut was un grandioos succes en op beide aovende moge zej hun ekt twië kier opvoere.

Nao de pauze begos Vorst Ruud mit enkele stellinge um de zaal dur bej te kriege. Prins Hans en Prinses Monique ginge de zaal ien en meense kosse daor reagiere op de stellinge of kosse de latste roddels nog kwiet.

Toen kwaam dur un an wal geraakte Prins Jeu op ut podium, den wier geïnterviewd dur Paul Jambers. Jeu Vieux was nou ienmiddels zwerver gewerre naodat hej dur dun alcohol an lagger wal was geraktr naodat hej Prins ien Oeldere was gewest. Ton en Emiel han un prachtig stukske opgezet.

Daorna kwaame dur drie kels elkaar helpe op de plee, de vrie grutste zeikers van de raad zeg mar. De korte toiletact was moj, de jonge ware dur sprakeloos van gewerre.

Dun twedde buutreedner stond op ut programma. Hej haaj huwelijksproblemen. Zien vrouw kos weinig goed doen. Den twedde buutreedner was zo goed dat Prins Hans van bej um viel.

As afsluuter stond dur dur veul zang op ut program. Dit jaor was dun afsluuter wat minder sterk en zej bleve dan ok nie plekke.

As tussendurtje was dur nog dun Dag van dun Lach van SLV ien Venrooij. Dit was un dag vol Humor, De Golden Humor wier uutgereikt an Pierre Knoops. Ut was unne hiële biezonere carnavaleske dag. Mit allemaol Limburgse carnavalsvereniging wiewier dur fiest gevierd. 's Aoves nog un fakkeltocht en daorna un knalfiëst ien de Wetteling. Prachtig um ien zo'n groëte ruimte mit allemaol vère, mutse, muziekanten en carnavalsvierders te zien.

#### Prinsroaje

Op zondag 19 december wiewier dur an de deure ien Oeldere gevraagd wie d'n Neje Prins zij werre. Nog vur Kerst mosse de meense al naodenke ovver de neje prins. De carnavalsvereniging haj dit jaor blik op ozze neje Prins ien 't Krentje op un aantal kandidate. Op ut durpsplein stond ut blik. Daorien zate anwizinge wie de neje prins zij werre. Elke wèk ging dur un lempke mier an en kwaame dur neje spulle ien te ligge.

Op 2 januari was ut Prinsaftreeje, urst wiewier Jan Driesse onttrout as Joker Jan. Jan hej zien weurd terug genome. D'n Terp zaat goed vol, dur was veul volk op afgekome. Vorst Ruud blikte terug op ut Prinsejaor van Prins Hans en Prinses Monique. Vorst Ruud hielt zoas hej is ut verhaal kort, duidelik en moj. Prins Hans en Prinses Monique bej dizze wille wej ollie bedanke vur ut moje prinsejaor 2004. An al ut moje kumt un end en Hans en Monique mosse de mantels en vère ienlevere.

Vervolgus ginge alle meense die ien d'n Terp ware ien unne polonaise aachter de Mök is los an naor de Linde. De Linde begos daornao vol te loëpe. Daornao was ut de beurt an Vorst Ruud. Ok hej mos dur an geluve en ok hej stopt dur mit as Vorst. Ruud en Natasja bedankt dat gillie deze bijzonere en zwaore taak op ollie het wille neme.

Urst kwaam de neje Vorst uut. Vier kels stoande op ut podium. De kalste kel van Oeldere den zuuj de neje Vorst werre. Ut was Vorst Eric. Vorst Eric veul succes mit de moje mar zwaore taak as Vorst van de Spurriemök.

De schuufwand wiewier opegemaakt. Ut prinsuutkomme kos beginne. Dus stond un Telemökmesjien. De toekomst wiewier vurspeld. Allelei Prinse kwaame vurbej geschote, de Telemökmesjien begos werrum te drèje. Alle attribute die ien ut blik lage wiere ien ut mesjien geled. Toen kwame dur un aantal meense teverschien op ut beeldscherm. Toen ut mej begos te duuzele kwaam de neje Prins en Prinses mit un raket dur de wand gevlooge: Prins Emiel en Prinses Ankie.

Nao unne geweldige speech waor Jambers nog efkus ien terug kwaam, begos dur unne groëte polonaise. Daornao wiewier de spanning wèr wat opgevoerd umdat ut jeugdtrio nog uut mos komme. De jeugdraodsleje die ut net nie geworre ware begosse ur speeches veur te lèze. Ut trio stond achter de scherme ongeduldig te waachte. Vervolges sprong ut trio te verschien. Prins Willem, Vorstin Kyra en Nar Imke. Nao unne vette polonaise en felicitaties was de ier an Oeldere West. Daor kwaam dit jaor ut boerebrudspaar van. De vier kandidaatspare zaate op de kar en iederiën mos naor buute. Dur wiewier un mök los gelaote en ien ut genummerd vak waor hej scheidt, kwaam ut Boerebrudspaar. Ut wiewier vak drie, dit was ut vak van Wout en Anne-Marie. Wout Zanders en Anne-Marie Willems han de ier Boerebrudspaar 2005 te meuge zien.

Iederien den uut mos komme is uut gekomme, dus kos ut fiest beginne. Ut was druk en moj en dur is goed gefiest. Ut ging nao de Linde nog dur ien de soos. Daornao zien wej bej Ankie en Emiel eier gaon ètè. Ut was goed druk en de eikes waare zoë op. Vervolges wier dur bej Paula en Gerrit nog durgefiest. Ut was un moje en goeje start mit de neje prins en alles wat dur bej huurt.

Op 12 jannewarie was de JVV-aovend. Ut was un moje aovend, vergeliekbaar mit vurgaonde jaore. De vuutjes ginge van de vloer op de muziek van Nabbe Sef. Helaas zurgde den toch nog vur un nare bejsmaak an dit verder moje fiest. De volksdansgroep haj ur dansje klaor en zurgde dat iederien nao ut derde nummer op de vloer stond. Ok Loone en Thej ware wèr van de partij. Zej kiego mit ur schuune mupkes en grappen de zaal an ut lache. De mystery gast meug ok nie ontbrèke. Dit kier was ut un ald wief. De mèste raodsleje zooge ut metien, dat is ut alde wief van de Mulder, en ja ut bleek Marco de Mulder te zien.

#### Aldwieverbal

Dun dag is wer angebrooke, vur ut groëte fiest. Gans Oeldere is uutgeloëpe um te laote zien wie ut mojste, lellukst en ut mèst onherkenbaar is. Dur wier nog efkus teruggekemme op de verlaote nejjaorsduik van Ex-Prins Thej, de raod en Prins Emiel mosse dur angeluuve. Dur hebbe 24 groepe en duos mit gedaon. De jokers stonde dit jaor centraal. De commissie haj goed gezurgd dur ware genoeg koaje, parsvleis en bloedworst. Ok smieke de prieze wèr heerluk. Bej de groepe haj wej loëpe vur Jan Joker gewonne, zej wonne un ald wief. Dit was nej un vervanger vur de wisseltroffee. Zej kwaam naor beneje gevalle. De twedde pries was vur de kammeruj van Thej, de badgangars. Derde wiere “wej halde nie van rooy mar van oranje”. Bej de duo’s haj Hans Loonen en vriendin gewonne, zej kwaame uut de middeleeuwe. Ut was un biestig gezellig fiest. De band was goed en zurgde vur un goeje stemming. Daorna is raod eier gaon ète bej Johan en Nancy.

#### Circus Mök

Vrejdags daarop ginge wej op uutnuëdiging van de Piëlhaas naor Circus Mök. De Piëlhaas biedt de carnavalsverieningen die angeslote zien bej de vorsteraod vort jaorluks an un enne aovend mit te make op Circus Mök. Wej hebbe daar enne moje aovend gehad.

’s Zondags ging un hiële afvaardiging naor Montfort zej han jubileum. Wej mosse gruweluk lang waachte vur dat wej an de beurt ware. Ut was dur goed gezellig.

Ienmiddels was ozze carnavalskrant ut Spurriemökske ok wer verrig. Dit jaor un kei moje krant mit un prachtige veurkant en leuke stukskes.

Names de Kammeruj kreege Prins Emiel en Prinses Ankie un etentje aangebode, bej AC. Dit is een moj gebaar en ut was erg gezellig. Ozze Vorst kos mej nie precies zegge wannier dit was.

#### Reseptie

De reseptie was moj en druk bezocht. Iën van de mojste momente vur ut Prinsepaar Emiel en Ankie en ut Jeugdprinsetrio is de reseptie. Dur wiëre zoas gewoonluk stukses opgevoerd en liedjes gezonge. Zoë as altied unne lange dag en un druk bezochte reseptie, mar zeker ok un gezellige reseptie. An ut eind van de reseptie kreege de stopper Eric Geurts nog un onderscheiding, hej kos vurrig jaor nie, uutgereikt dur de Vorstenraad umdat hej 11 jaor mit de kieps op de kar van os vereniging mit het getrokke. Nao ut officiele diël is dur nog flink gefiest ien de Liende. De joekskapel was echt kei goed en zurgde dat ut dak dur afging.

Vervolges is de raod eier gaon ète bej Wout en Lilian. 's Aovus was ut wèr errug rustig ien d'n Terp. Iederien haj de piep vort leeg.

Ut LVK was ok nog vur de Carnaval. Wat ik nog wel wiët is dat dat un grandioos festein was. Hierbej is Prins Emiel duk op televisie gewest. Hej hèt dur wel moeite vur motte doen, mar uiteindeluk is ut gelukt.

De carnaval kumt al ien zicht. Ut is al snel donderdagaovend. Zoëas altied vur de carnivalsverieniging ut begin van de carnaval mit un bezuuk an de carnivalsaovend van de SJMO.

Vrejdagsmiddags volgt urst dun optocht, den was wat rommmelig. Dan ut schôlcarnavalsbal, ut is moj um te zien hoe die klène allemaol mitdoen en vechte um dèn mantel vast te meuge halde. Carnaval viere zit dees möskes al ien ut bloed.

Op vrejdagaovend was ut tied um op ziekebezuuk te gaon. Dur lej niemus ien ut ziekehuus, dus hoofde Prins Emiel en Prinses Ankie nurges hin.

Ut kleinste möske wier op carnivalszaoterdag bej Tom Verbruggen en Susan Joosten ien de tuin gezet. Dit jaor was ut klènste möske Jens Verbruggen . Um 11.11 uur wier ut möske geplatst en beschuut mit muuskes gegète.

Same mit Cassele en Ostum ginge wej 's middags mit de partybus naor de schouwburg. Ien de bus wier der al flink gezonge en gefiëst, dit was un goej begin van de carnaval.

Vur de verandering was de installatie van de prinse nie ien ut Gemèntehuus, mar ien de Foyer. Ozze wethalder Joker Jan, was gevluht en was nie anwezig bej de installatie. Dit was wel jaommer. Ut was nie goed opgesteld en ien de Foyer koste weinig zien. Burgemèster Waals gaaf ut goeje veurbeeld en gaaf un kritische noot op zien eige gement. Dur was wèr voldoende stof um over te praote. De gemènte blijft blunders make, waordur de Vorst van de kerkdurpe voldoende stof hèt. Vorst Bas van de Karklingels haj un goeje rake speech.

De vastelaovesmis was erg druk bezocht. Ondanks dat deze een half uur vervroegd was. What's Ever zurgde vur en moj stukske muziek. As leste ien de vastelaovesmis was het de beurt an ozze Vorst Eric den ien ziene speech un dankwoord haj vur de vrollie van de raod.

Nao de mis ginge wej vur dun 17<sup>e</sup> kier bej pastoër op de koffie. Ien de pastorie kreeg pastoër vervolges nog un moj carnivalsonderscheidinge um ien ziene kast te hange. Ut kado viel bej Patoer en Jet goed ien de smaak. Ok ut hundje werd noeits vergete.

Nao ut korte bezuuk an de pastorie volgde ut Mökkebal ien de Linde. Zoëas wej ien Oeldere gewent zien was ut unne gezellige aovend. De band was goed en zurgde ok vur un geweldige sfeer. Iederien duj mit. Nao afloop wiere dur nog wat eikes gebakken ien de Liende. Kortum de opening was goed.

Zondag rond de middag wierre Prins Emiel, Prinses Ankie en Jeugdprins Willem afgehald mit de carnavalswage. Dit onder begeleiding van ôs eige joekskapel "de Mök is los". Daornao zien wej mit zien alle dat wil zeggen de Raod, Jeugdtraod en de Mök is los en anhang bej d'n Terp aangegaon vur de brunch. Dizze brunch was goed verzugd. Nao de brunch was d'r efkes tied um bej te kletse en os veur te bereide op ut kienderbal. Dur wiere ok nog wat medailles uut gereikt.

Ut kienderbal was gezellig en goed bezocht. De spurriemökses han ur best gedaon op de kleurplate en de pries wiere 's middags dan ok uutgereikt. Ozze Prins Emiel en Prinses Ankie en ut jeugdduo ginge veurop en dun goed mit. Helaas mos ozze Jeugdprins Willem afhake umdat hej mit griep ien bed laj. Errug sneu veur Willem. Dur wier veul gehost en gedanst. 's Oavends ien d'n Terp was ut moj vol en kei gezellig. Dur wier flink gehost en gespronge en de sfeer was goed. Duudeluk wier dat Emiel verrekus goed Duits kôs praote. Ok kwame Rob en Johan los als Meatloaf en ginge flink te kier.

Maondag

's Merges is dur Snotneuzebal. Ut is echt fiëst vur de klènste mökskes.

Dit jaor han wej geluk en stonde redeluk an ut begin van de Venrojse optocht. Daornao kwaam ut kienderbal waor ut druk en wèr kei gezellig was. As gej de kiender ziet hosse en danse un schon gezicht vural as zej ur eige muziek hebbe of an die an kunne vraoge. Dur de griepgolf ware dur toch un antal meense nie die dur normaal wel zien.

's Aoves was ut wer gezellig ien dun Terp. Marc belde op ien d'n Terp dat hej vader was geworre van un moje dochter Yaniek. Un echt spurriemökske, hoe kan ut mojer mit de carnaval. Ok vandaag bleek wèr dat Prins Emiel zijn prinses nie bej kos halde. Ankie ging mar dur en dur, mar Emiel haj de piep vort leeg.

Dinsdags:

De Boerebrulloftsbuurt haj ur best gedaon en kwaam mit un traditionele boerebrulluftstoet.. Daornao trok dun optocht an un paar meense vurbej, de rest van Oeldere duj mit. Daornao volgde dur un drukke middag ien de Liende. Ut Boerebrudspaar Wout en Anne-Marie trok veul volluk, ut was goed vol. Dur wiere un aantal stukskes gedaon. Ok de jeugd kos wèr flink danse en springe op de meziek van dun diejee. Mar dan kumt de boeremoes al wèr ien zicht. Ok dit jaor was dur wèr genoeg vur iederiën.

Um tien uur kwaam dur un eind an de jeugdcarnaval. De mök wier angestokt. De jeugdtraod was kei enthousiast ovver de carnaval. Jaommer was dat Willem ziek en half fit anwezig was. Wej ware kei enthousiast ovver os jeugdtrio en de jeugdtraod. Dit jaor gaaf de jeugd ut goeje veurbeeld. Zej hebbe kei goed mit gedaon en de stemming was goed.

Drie daag Soos

Druk, hèt, zwiët, veul jeugd. Dat is de soos. De jeugdcommissie van de soos hèt ok dit jaor wèr gezurgd dat de jeugd ien Oeldere carnaval kan viere. Bej dizze wille wej de jeugdcommissie bedanke vur alles wat zej vur de jeugd mar ok vur de carnavalsvereniging doen.

Ien dun Terp was ut vol en gezellig. Dur wier nog lekker gehost, gespronge en gedronke. Ut ging dur wild an toe. Op un gegève moment was Nancy los en ze bleef ovver ut biljard gaon. Net as al die andere. Ut was lüstig! Toch môs dur um 23.45 uur un moment van afsluting zien.

Dit jaor stopte dur gelukkig niemus. Prins Emiel en Prinses Ankie wiere nog efkus op ut biljart gezet. Waorna wej mit zien alle naor buute ginge um de mök an te stoke. Daorna wier dur nog flink nao gefiëst en gekletst ovver un biëstig moj carnavalsseizoen. Jan Classes haj zo goed gefiëst dat ziene jas gèn mouwe mèt haj, zo rot as de nuuj vort ware.

Kortum Carnaval 2005 was en prachtig fiëst. Prins Emiel, Prinses Ankie, Vorst Eric, Jeugdprins Willem (Lemmen) Jeugdvorstin Kyra (Nelissen) en Nar Imke(Gommans), What'sEver, de Mök is los, Bestuur, groëte en klène raad en alle carnavalsvierders bedankt vur dit geweldige jaor.